

Thursday, August 14, 2025

Time - 2:30pm - 2:35pm

AKASHVANI AIZAWL
REGIONAL NEWS UNIT



ADVISER TO CM

Adviser to CM Pu Lalmuanpuia Punte chuan vawiin khan hrilh lawk lovin Mizoram leh Assam Inrina hmun hrang hranga Police duty-na hmun a tlawh kual.

Adviser to CM hian tunhnaia thenawm state Assam in dan lova an state a ramdang mi hnawhchhuah runpui a neih avangin Mizoram lam a nghawng thei em tih a enfiah a, ramri hrul police duty-na hmun hrang hrang tlawh nghal in, August ni 13 zanah hian hrilhlawk lovin Bairabi Police station leh Rel Station bakah Assam ramri bula duty post, ILP endikna leh pekchhuahna hmun tlawhin Police te mamawh hrang hrang leh hmunhma bakah thawktu an indaih em tih te uluk takin a enfiah a, vawiinah Vairengte, Phaisen leh Saiphai, ramri hrul a Police duty leh hnathawh dan enfiahin Bairabi khawtlang hruaitu tlawmngai pawl YMA leh MZP hruaitute nen an inkawm bawk a ni.



SPORTS MINISTER

Sports Minister Pu Lalnghinglova Hmar hovin nimin khan a pisa ah August ni 29 a ‘National Sports Day, 2025’ hman dan tur rel a ni.

Sports Minister chuan National Sports Day chu Indian hockey player hmingthang Major Dhyan Chand piancham-a hman thin a ni tih sawiin “Sawrkar laipuiin ram pumah uar taka National Sports Day hman a duh a ti a, Infiamna, hriselna leh ‘fitness’ chawisan nan Mizoramah pawh uar tak leh phur taka hman a tha tih sawiin zirna inah taksa leh rilru hrisel pawimawhzia inzirtirna remchang tak a ni tih a sawi bawk.

Mizorama ‘National Sports Day 2025’ lawmna pui ber chu August ni 29 ah SAI Training Centre, Mission Vengthlangah hman nise tiin meeting chuan a rel a. S&YS, MSSC, SAI officer leh staff te bakah Aizawl-a NCC leh NSS te, SAI leh KISCE trainee te chu group pali ah inthen in futsal (mipa), in arpa sual (mipa), volleyball (hmeichhia) leh inkawibah (hmeichhia) ah te an inel dawn a ni. Zirna in hrang hrangah ‘Fit India’ thutiam lâk leh infiamna neih te, National Sports Day chungchang inzirtirna te State NSS Cell bultumin kalpui nise ti a rel a ni bawk.

Kumin National Sports Day hi ni hnih chhung hman a ni dawn a. August ni 30 ah S&YS Department hnuai academy hrang hrang te, KISCE leh district hrang hranga Khelo India Centre te, MSSC leh SAI (Aizawl) te’n anmahni hmun theuhah inelna buatsaih nise tiin meeting chuan a rel a ni.

(DIPR)



RRR CENTRE

Vawiin khan Urban Development & Poverty Alleviation Department hnuai Swachh Bharat Mission (Urban) 2.0 hmalaknain, Permanent Reduce, Reuse and Recycle (RRR) Centre

chu Govt. Multi-Utility Centre, Thakthing-ah Pu Lalmalsawma Pachuau, UD&PA Secretary-in a hawng.

RRR Centre hi bawlhhlawh paih tih tlem, hman nawn theih hman nawn leh hman tangkai dan kawng zawn nana hmalakna niin, mipuite tlawhpawh theih reng tura hawn a ni a. A phal apiang ten an bungraw hrang hrang - thuamhnaw, pheikhawk, lehkhabu leh zirlaibu hlui, choka bungrua, toys leh thil dangte, an hman tangkai tawh loh, la hman tlak si te, a mamawh zawkte tana an thekhawmna hmun tura duan niin, a duh leh mamawh apiangin, an duh ang ang a thlawnin an la ve thei dawn a; he hmalakna hian nasa takin bawlhhlawh paih mai tur a tih tlem dawn bakah mamawhtute tan hmemhnawm tak a ni thei dawn a ni.

Reduce, Reuse, Recycle Campaign hnuaiah hian March, 2025 khan Swap & Save - Sikul Bungraw Inthleng Runpui chu Mizoram District Headquarters zawng zawngah neih a lo ni tawh bawk a, zirlaite leh zirlai nu leh pa ten an hlut hle a ni.

RRR Centre, Thakthing-ah hian a duh apiangte tan phal thil thekhawm reng theih a nih bakah mamawhte pawh lak theih reng a ni dawn a; UD&PA Department chuan mitinte he hmalakna hi thlawpa, mahni theihna zawn theuha tan lo la ve tur leh RRR Centre pawh lo tlawh ve ngei turin a sawm a ni.

(DIPR)



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar puan leh a ni ang.



WOMEN EMPOWERMENT

State Hub for Empowerment of Women, Women and Child Development buatsaihin vawiin khan Hmeichhe dinhmun chawi kanna tur leh naupang enkawlna tur chungchang Mara Thyutlia Py (MTP) Headquarters Conference Hall ah sawiho a ni.

Thutkhawm hi CDPO Pi Hepaw Hlychho chuan kaihruaiin Deputy Director (W) & Nodal Officer-Sambal Pi Flora Laltanpuii chuan Women and Child Development kal dan tlangpui bakah hmalak na hrang hrang a sawi a. Mizoram women helpline number 181 chungchang sawiin number chu hman tirth atangin Mizoram pumah singhnih chuang call dawng tawh mahse Siaha ah chuan call 41 chiah a awm tih a sawi a, hmeichhiaten 181 helpline chu an hman tangkai theih nan mipui hnenah hrilhhriat a pawimawh takzet a ti a, hmeichhia leh naupang enkawl nan a sawrkar laipui scheme kal dan hrang hrang sawiin One Stop Centre chu tangkai lehzuaw zawkah hman a pawimawh thu a sawi bawk.

Deputy Director Pi Flora chuan Siaha District chu hmeichhia leh naupang enkawlna hmun dang aiin tehna hrang hrangah an hniam thu sawiin tan lak a ngai hle a ti a, Siaha District ah hmeichhia leh naupangte dinhmun a lo that zawk nan mi tin tan lak a pawimawh thu a sawi bawk.

(PR)



PARTITION HORRORS REMEMBRANCE DAY

Vawiin hi India leh Pakistan thenhran avanga nunna chan leh tuartute hriatrengna Partition Horrors Remembrance Day a ni a, Prime Minister Narendra Modi leh Defence Minister Rajnat Singh bakah Union Home Minister Amit Shah ten ram thenhran anih laia tuartute hriatrengna hun an hmang.

Partition Horrors Remembrance Day hi kum 1947 a ram tan a nunna hlantu leh harsatna tuar tute chawimawina atan hman thin a ni a, buaina avanga ram tana nunna chan leh harsatna tawk te pual hian sawrkar chuan kum 2021 August ni 14 khan hriatrengna atana hman tawh turin a rel a ni.

(NewsonAIR)



PRESIDENT

President Droupadi Murmu chuan vawiin hian Independence Day vawi 79na pualin thu a sawi dawn.

Hei hi zanin dar 7 ah Akashvani leh Doordarshan channel zawng zawng ah tihchhuah a ni dawn a, Hindi a tihchhuah hmasak ani anga, chumi hnu ah English a tihchhuah leh a ni ang. Akashvani chuan zanin dar 9:30 ah channel hrang hrang ah mahni hnam tawng theuh in a tihchhuak a ni dawn a ni.

(NewsonAIR)

